

PRENTSA. Ipar Euskal Herriko jende multzo batek abiatu du proiektua, EKHE fundazioaren sostenguarekin

‘Euskal Herriko kazeta’ egunkari elebidun berria sortuko da Iparraldean

Urriaren erditsutik goiti, 5.000 ale inprimatuko dituzte ia egunero



ANGELA MEJIAS

Hur Gorostiaga, *Euskal Herriko kazeta - Le journal du Pays Basque* egunkariko zuzendaria.

Eneko Bidegain | BAIONA

Ipar Euskal Herriko kioskoetan egunkari berri bat ezarriko da salgai urriaren erditsutan. *Euskal Herriko kazeta - Le journal du Pays Basque* egunkariak prentsa munduko eskaintza aberastu nahiko du. Frantsesez eta euskaraz idatziko dute, nahiz eta frantsesari toki handiagoa emanen dioten. Astelehenetik larunbatera, egunero argitaratuko dute, eta egunean 5.000 ale inprimatuko, hasieran segurik.

Egunkaria Ipar Euskal Herrian banatuko bada ere, «Euskal Herriko errealtatearen» berri emanen du, Hur Gorostiaga zuzendariak —azken zortzi urteetan EUSKALDUNON EGUNKARIAKO kazetari egon denak— azaldu duenaren arabera. Ipar Euskal Herriko jendeari Hegoaldeko informazioa ere emanen zaio «egunero eta profesionaltasunez». «Hedabide askok informazioa mugan gelditzen dute, nahiz eta jakin mugaz bestalde errealtate bera dugula», dio Gorostiagak. Egunkari berriak «zerbitzu guztietan Euskal Herri osoa hartuko du kontuan».

Hala ere, tokiko berriek garrantzia izanen dute. Kirolak ere toki handia beteko du. Horrez gain, iritzi sailean indar berezia egingen dute. «Alde guztietako jendearen» kolaborazioak nahi dituzte, «eztabaida sustatzeko». Gorostiagak oraino gogoan du Garapen Kontseiluaren esperientzia. Orduan, «aktore sozio-ekonomikoak ohartu ziren elkarrekin bizitzeak eta eztabaida-

EZTABAIDA

Eztabaida guneari lehentasuna eman, eta zutabeak iritzi desberdinetako jendeari irekiko dizkiote

tzeak zer interesa zuen». Horregatik, «eztabaidarako beste tresna bat» izan nahi du egunkari horrek, «iritzi eta ikuspuntu desberdinen» ekarpenarekin.

EKHEren parte-hartzea

Sail desberdinetako jendeak «mementuz harrera ona» agertu duela dio Gorostiagak. Jendeak horrelako «egunkari baten beharra senditu» zuela adierazi zuen zuzendariak. «Gogoeta duela zenbait urte hasi» zen. Zenbait gogoetaren buruan «proiektua sortu» zen, eta EKHE (Euskal Komunikabideak Hedatzeko elkarteak) fundazioak sostengu handia ekarri dio. Gorka Altuna EKHEko arduradunarekin harremanetan sartu, eta hark «segituan agertu zuen interesa». EKHE kapitalaren sartzeko prest agertu zen, baina frantses legediak «atzerriko» kapitala % 20era mugatzen du. Ondorioz, gainerako kapitala akziodun pribatuetatik dator. Hilabete honetan harpidetza kanpaina eta finantzaketa bilaketa abiatuko dituzte. Egunkari «berria, dinamikoa, hurbila eta Euskal Herrikoa» arrakastaz abiatzeko asmoz.

ESKOLA SARTZEA. Hendaian eta Angelun ere beste postu erdia izanen dute

Paueko Akademia Ikuskaritzak postu erdi bat onartu du Itsasuko eskolarendako

Aitor Renteria | BAIONA

Atzo goizean Itsasuko (Lapurdi) eskola inguruan arregura eta urduritasuna nagusi baziren ere, dagoeneko ontsa baretu dira bertako eskola publikoko guraso eta irakasleen aiherkundeak. Aste osoan zehar Itsasuko gurasoek eskolaren okupazio sinbolikoa egin dute gatzetxoenen gela elebidunean, haurren metaketa salatuz. Asteazkenean zehar eguneko lehen orduetan egin duten bezala, atzo goizean ere eskolako gurasoek banderolak zabaldu zituzten eraikuntza atari eta sarreretan.

Horrez gain, «bidaia bat antolatu dugu, Paueko Akademia Ikuskaritzaren Batzorde Paritaria gure aldarrikapenak

sostengatzeko, Pauen ere goraki entzun daitezen», adierazi zuten Cecile Juzanek eta Alain Cazenavek, Gure Eskola guraso elkartearen eta okupazio mugimenduaren bultzatzaileen izenean.

Izan ere Euskal Herritik kanpo, Paueko Batzorde Paritarioan deliberatzen zuten atzo eguerdian zein izanen den aurtengo eskola kartari dagozkion gela eta irakasle kopuruak. Halakoetan gertatzen ohi den bezala, batzuen bozkarioa besteen auhena bilakatu da. Eta Itsasuko erdietsi du beste postu erdia. Haatik, buruhaustea ez da lurrundu. Paueko Ikuskaritza batzordeak deliberatu beharko du nor izanen den atzo onartutako postua hartuko duen pertsona. Gaur egun

Maritxu Xarriton ari da denbora erdiz Itsasun, eta Kanbon bertze erdiz.

Batzordeak deliberatu duenez, Itsasuko eskola publikoak ez ezik, Angeluko Herriot eta Hendaiaiko Boulaert eskoletako gela elebidunek ere euskarazko lanpostu erdi gehiago ukanen dute ikasturte honetan.

Frantses elebarkarrean diharduten eskolen kasuan, Baionako Citadelle eta Jean Moulin zentroek postu bana gehiago dukete atzotik.

Aipagarria da Angeluko Herriot eskolak gela elebidunetan atzo irabazi duen lanpostu erdia eskola frantses elebarkarrean galtzen duela. Angeluko Galois ama-eskolak ere beste postu oso bat galdu behar luke frantses elebarkarrean.

Alabaina, ondoko egunetan oraindik han-hemenka biziko dira okupazio eta protestaldiak eskoletan, irakasle kopuru tipiak edo haurren metatzea salatuz.

KONTSUMOA. 30 denda inguru bisitatuko dituzte

Jaurlaritzak kontrolatuko ditu iaz liburuen deskontuan ilegaltasunak egin zituztenak

Erredakzioa | GASTEIZ

Eusko Jaurlaritzako Kontsumo Ikuskaritzak Arabako, Bizkaiko eta Gipuzkoako 30 denda kontrolatuko ditu hilaren 20a bitartean, gehienak saltoki handiak —Bizkaian 14, Gipuzkoan 11 eta Araban 5—. Horrela jakinarazi zuen atzo Josu Jon Imaz Industria eta Kontsumo sailburuak.

Iazko liberalizazio neurrien ondotik, eskola liburuen deskontuan irregulartasunak egin zituzten saltokiak dira. Espainiako Gobernuak dekretua onetsi eta bertan behera utzi zuen %12tik gorako deskontua egin ahal izateko debekua.

Hala eta guztiz ere, Gasteizko gobernuko Kontsumo Zuzendaritzak irregulartasunak

sumatu zituen; hala nola, prezioaren berririk ez zela agertzen, edo, deskontuei dagokien, aurreko prezioa nahiz merkatutakoa ez zirela zehazten.

Bestalde, zenbait kasutan ikusi zen %25eko deskontua ez zela salmenta prezioaren gainean, dendak jarritako salneurri handiago baten gainean baitzik.

Jaurlaritzaren kanpainak Lehen Hezkuntza eta Hezkuntza Ertaineko eskola liburu kopuru handia hornitzen duten dendak kontrolatuko ditu. Izan ere, Imazek onartu zuen iaz erabiltzaileen kexu asko jaso zituztela, eta, horrexegatik, besteak beste, deskontuei buruzko publizitatea betetzen ote zen egiaztatu zela.